



PREZIDÉNSIA  
KONSELLU  
MINISTRUS  
VIII GOVERNUN KONSTITUSIONÁL



Gabinete  
Porta-Voz

**Komunikadu Imprensa**

**Sorumutuk Konsellu Ministrus nian iha loron 21 fulan-outubru tinan 2020**

Konsellu Ministrus hala'o sorumutuk iha Palásiu Governu, iha Dili, no delibera atu propoin ba Sua Exelénsia, Señór Prezidente Repúblika, Francisco Guterres Lú Olo, **renovasaun estadu emerjénsia**, ba loron tolunulu. Hodi atende ba evolusaun preokupante sira husi situasaun epidemiolójika no proliferasaun ba kazu sira ne'ebé mak rejista ona husi kontájiu COVID-19 nian, iha nivel rejionál, no mós iha nivel mundiál, atu evita no neutraliza risku sira husi propagasaun SARS-CoV-2, atu nune'e bele proteje saúde públika no iha kbiit atu hatán ba Sistema Nasionál Saúde, Governu propoin ba Señór Prezidente Repúblika katak, ho estensaun husi deklarasaun kona-ba estadu emerjénsia, permite atu suspende ka restrinje direitu sira kona-ba sirkulasaun internasionál, sirkulasaun no fiksasaun rezidénsia no rezisténsia.

Aprova mós projetu Proposta Lei, ne'ebé apresenta husi Ministru Justisa, Manuel Cárceres da Costa, kona-ba **Rejime Jurídiku Asosiasoins Públikas Profisionais**. Ho diploma ida ne'e, Governu propoin ba Parlamentu Nasionál atu atribui ba ordenamentu jurídiku Timor-Leste nian kuadru legál ida ne'ebé hakle'an prinsípiu importante sira ne'ebé tenke observa iha kriaun futura orden profisionál no kámara profisionál nian sira. Ho rejime jurídiku ne'e atu asegura katak profisaun sira ne'ebé, husi ninia espesial interesse públika, tenke sai nu'udar objetu regulasaun nian, ka, iha kuadru legál ida nia-laran ne'ebé respeita ba ninia autonomia, maibé mós permite ninia dezvoltamentu, hodi hakruk ba Konstituisaun no ba soberania nasional, no ne'ebé maka kontribui hodi reforsa konfiansa iha qualidade téknika no étika husi profisionál sira Timor-Leste nian.

Konsellu Ministrus aprova projetu Proposta Lei, ne'ebé apresenta mós husi Ministru Justisa, kona-ba **kriaun Orden Advogadu Timor-Leste (OATL) no aprovasaun ba ninia estatutu**. OATL ne'e sei hanesan asosiasaun públika ne'ebé representa advogadu sira no advogadu estajiáriu sira Timor-Leste nian, ho personalidade jurídika no sei la sujeita ba poder sira orientasaun nian husi órgaun sira Estadu nian ka kualkér pesoál kolektiva públika ka privada, ne'ebé mak independente no autónoma iha realizasaun ba ninia objetivu sira. Ministru Justisa mak ezerse poder sira, ba tutela legalidade nian kona-ba OATL ne'ebé prevee iha rejime jurídiku asosiasaun públika profisionál sira. Husi atribuisaun oin-oin OATL nian, inklui responsabilidade husi atribuisaun ba título profisionál advogadu no advogadu estajiáriu nian, nune'e mós regulamenta ezersísiu ba ninia profisaun. OATL sei kumpre atu defende direitu no interesse husi ninia membru sira, promove formasaun, atualizasaun no aperfeisoamentu profisionál no kontribui ba interkámbru, kolaborasaun no kooperasaun ho instituisaun sira ne'ebé hanesan.





# PREZIDÊNCIA KONSELLU MINISTRUS

VIII GOVERNUN KONSTITUSIONÁL



Gabinete  
Porta-Voz

Konsellu Ministru aprova ona, projetu Dekretu Lei, ho alterasaun sira, ne'ebé apresenta husi Ministru Petróleu no Minerai, Victor da Conceição Soares, kona-ba **alterasaun dahuluk ba Orgánika Ministériu Petróleu no Minerai nian**. Projetu Dekretu-Lei ne'e kria Diresaun Nasionál Polítika, Planeamentu, Monitorizasaun no Avaliasaun. Ho alterasaun ne'e, Prezidente sira husi Instituisaun autónoma sira ne'ebé tutela husi Ministériu Petróleu no Minerai – TIMOR GAP, ANPM no IPG, IP - integra mós ba Konsellu Konsultivu.

Sekretária Estadu ba Igualdade no Inkluzan, Maria José Fonseca Monteiro de Jesus, apresenta ona projetu Deliberasaun nian, ne'ebé mak aprova ona husi Konsellu Ministrus, kona-ba **projetu kontra violénsia bazeia ba iha jéneru "Preventing and Responding to Gender-Based Violence in Timor-Leste" (Prevene no fó Resposta ba Violénsia Bazeia iha Jéneru iha Timor-Leste)**. Projetu ne'e atu kontribui ba prevensaun violénsia bazeia ba iha jéneru no disponibilidade rekursu sira ne'ebé sufisiente, destinadu ba implementasaun no monitorizasaun lejislasaun no polítika sira kona-ba violénsia bazeia iha jéneru iha espasu públiku sira, ho atensaun espesial ba fetu sira ne'ebé iha situaun vulnerabilidade boot liu hodi konsidera ninia kondisaun física no mental no ba fetu sira hela iha área hirak ne'ebé mak iha risku boot ba dezastres naturais. Projetu ne'e iha durasaun fulan 48 no orsamentu ida total dolar amerikanu hamutuk millaun 7,7 sei implementa husi *UN Women* Timor-Leste, iha koordensaun ho Sekretaria Estadu ba Igualdade Jéneru no Inkluzan, iha parseria ho ajénsia Nasoins Unidas nian sira seluk no iha kooperasaun ho Ministériu no instituisaun pública sira seluk ne'ebé relevante, nune'e mós organizasaun sira sosiedade sivil nian. Projetu ne'e, integra iha âmbito Planu Nasionál nian kona-ba violénsia bazeia ba jéneru, iha potensial atu reforsa implementasaun planu multisektoral sira ne'ebé desenvolve no lidera husi Governu.

Ikusliu, Ministru Administrasaun Estatál, Miguel Pereira de Carvalho, apresenta **opsaun polítiku-lejislativa sira ne'ebé submete ba projetu Rezolusaun Governu nian kona-ba ezekusaun estratéjia descentralizasaun administrativa nian no instalasaun husi órgaun representativu nian sira Podér Lokál nian**. Nune'e to'o iha mandatu ikus Governu Konstitusionál VIII nian, bele alkansa Administrasaun ida ka Autoridade Munispál ho estatutu pesoa kolektiva pública baze institusionál nian, no autarkia lokal, atu redefina asaun balu no rezultadu projetadu sira, ne'ebé daudaun iha estratéjia descentralizasaun administrativa nian, no mós estabelese prazu foun sira, iha funsaun viabilidade no kapasidade ezekusaun asaun sira ne'e nian. **REMATA**

